

Hoenzfeiz Dajcawj Menhmenh Siu Bae

□ Lij Yungzcangh / 李雄章

Sauhneix doeg sei ciuhgeq, doeg daengz haujlai sei dwen daengz hoenzfeiz lajmbanj, ndawsim gou fwt doengh, cuengq saw roengzdaeuj, caemcaem naemjngeix, siengj hwnj mbanjranz yo youq ndawsim gig nanz, engq siengjniemh gij hoenzfeiz dajcawj mbanjranz biungeungeu.

Youq ndaw uk gou, cungj miz aen congheueq he daj ranzhaz baihlaeng iet hwnjdaeuj, haethaet haemhhaemh, gij hoenzfeiz dajcawj baenz geu baenz geu, daj congheueq biu hwnj mbwn bae.

Hoeng, mwh iq, hoenzfeiz swng hwnj, mbouj itdingh couh naeuz miz doxgaiq cawj gwn, hoeng daihguya lij dwg muengh. Mizseiz gou lij cingq saetmuengh seiz, daxmeh fwt daj ndaw daeuh feiz saiq aen song aen lwgmaenz okdaeuj, faen hawj cejnuengx dou geij boux, hawj dou angqvauvau byongh ngoenz.

Haetromh, hoenzfeiz doiq dou daeuj gangj mbouj miz maz. Aenvih youq seizde, lwgnyez mbouj rox ngaizromh dwg maz. Haetromh miz hoenzfeiz, mboujgvaq dwg daxmeh ndat raemx swiqnaj, de aeu mbaw sujbaq rengqrarat he uet naj gou, uet bae uet dauq, lumjnaeuz yienghneix couh ndaej hawj gou dungx mbouj caiq iek nei. Bang gou uet naj sat, daxmeh yawjyawj aen rekdiet hoengq-hathat, danq gaemz heiq he, bek aen daehsaw gou naeuz: “Bae ba, youq hagdangz aeu dingq gij vah lauxsae, dauqma gou couh cawj souhgw gawj mwngz.” Gou baez dingq, couh angqvauvau aemq daehsaw bae hagdangz lo.

Mwh cuengqhag, gyoengq doengzdohi dou iek ndaej dungx hemqgugu, hoeng, aenvih yawjraen ranzhaz baihlaeng gizgyae swng hwnj gij hoenzfeiz ngeungeu, couh lumj nyouq daengz gij feihhom haexbyaek nei, hawj dou bonjlaiz mbouj miz rengz byaij naiqnuekneuk, nyaenx mbouj ndaej buet coh ranz bae. Mizseiz daengz ranz le lienz byaekheu cungj mbouj miz, cij miz vanj cuk gwn, hoeng doiq dou daeuj bbngangj, neix gaenq dwg gij cei ndeigwn gwnzbiengz lo.

Gij cei yaeuh vunz dwg gij hoenzfeiz banhaemh. Hoeng, caen aeu mingh, cuengqhag le gij hoenzfeiz ndawranz mbouj sikhaek mauh okdaeuj, dou iek yaek dai, lij dwg aeu bae gip byaekmou gip ganjhaeuxyangz, dauqranz le cij ndaej caux feiz cawj ngaiz. Daengz gyanghaemh, yienznaeuz hix dwg gwn souh, hoeng, daxmeh nanz mbouj nanz couh youq ndaw souh gya di lwgbiek, lwggva, hawj dou gwn ndaej diemzswdswd. Bingzseiz noh gig nanz miz, daengz cieng gvaq ciet boux he ndaej gaiq song gaiq nohbiz couh suenq ndei lo. Mizseiz miz vanj lwgsae daxmeh bae ndaw naz gip ndaej, mizseiz lij miz gij nohnyaeen daxboh daj gwnz bya dwk ndaej dauq. Doenghgij neix cungj dwg youq donq caeuz cij ndaej gwn, daengx ranz vunz humx youq henz congz gwn ndaej lumj gvaq cieng nei vuenheij.

Gij hoenzfeiz gwn cieng geij ngoenz de cei hawj dou vuenyungz. Daxboh cawx daeuj song sam gaen nohmou, yied biz yied ndei, caux feiz le, dawz nohbiz venj hwnjdaeuj guh nohlab. Guh nohlab, gij hoenzfeiz ndawranz baenz ngoenz baenz hwnz mbouj dingz. Cuengqhag seiz, youq rog ranz couh nyouq ndaej ndaw hoenzfeiz daiq miz gij feihhom nohlab. Nohlab sij mbouj ndaej mbat he gwn liux, nanz mbouj nanz, daxmeh gvej gaiq iq he roengzdaeuj, faeg ndaej saeqsaeq cuengq roengz ndaw byaek bae, daengx ranz vunz couh diemzsubsub gwn hwnjdaeuj. Bingzseiz yienznaeuz mbouj ndaej gwn noh, Hoeng moix baez muengh gij nohlab henjngaeuh youzrongh, dingq gij sing gij haj nohlab doekcaek roengz ndaw feiz bae fat ok sing “swsw”, gou roxnyinh hix dwg cungj yiengjsouh.

Baihgwanz dwen daengz gij hoenzfeiz dajcawj ndawranz, seiz iq gou lij miz gij hoenzfeiz dajcawj gyangdoengh. Ngoenzsinghgiz, geij boux doengzdohi dou doxciuz bae gwnz bya raemj fwnz. Daihguya cungj maij caeuq Daeglunz bae, aenvih de rumh bya cei sughangz, riengz de rumh bya hix ndaej cei lai. Aenvih

mbouj ndaej gwn ngaizromh, song vanj cuk haemhgong gwn gaenq bienqbaenz nyoh baiz okdaeuj lo, dungx iek raixcaix, youq gwnz loh bae dwk fwnz, Daeglunz couh daiq dou bae rij ra bya, mo ndaej bya dou couh bae ra fwnz daeuj caux feiz, youq gwnz feiz gangq bya. Gij bya gaeb ndaej mbouj lai, hoeng lainox ndaej hawj dou gwn le miz rengz bae dwk fwnz. Seizneix, raen gwnz daiz miz buenz nohbya, gou cungj dauqngex gij feizhoenz ngeungeu youq gyangdoengh, bang lwgnyez dou youq henz riuriu gangjgangj gangq bya……

Hoeng, miz di doxgaiq cungj rox riengz seizgan lizbae bienqbaenz lizsij. Mbouj rox daj seizlawz hwnj, gyoengq beixnuengx mbanjranz menhmenh yungh saeuqheiqmeiz caeuq cauqdienh…… Yienghneix, Gij hoenzfeiz hawj gou sug hix menhmenh siu bae lo. Mboujgvaq, gij hoenzfeiz gwnz ranz laeng gou biu ndaej cei nanz, daxmeh naeuz gij haexbyaek yungh fwnz daeuj cawj cij ndeigwn, yienghneix de boux ndeu laebdaeb aeu fwnz cawj haeux, bouxlawz gienq hix mbouj miz yungh, cij ndei bang de bwh fwnz. Daxmeh genheiz haj roek bi le, aiq dwg raen dou bae raemj fwnz mazfanz lai ba, de couh riengz yungh saeuqheiqmeiz lo, gij hoenzfeiz gwnz ranz daj seizneix hwnj hix menhmenh siu bae lo.

Bineix ndwencieng dauqbae ranz gvaq cieng, aenvih miz binghraaq, miz ngoenz song ngoenz mbouj miz vunz soengq guenqheiqmeiz, yienghneix youh ra fwnz daeuj ndaengjfeiz, geu hoenzfeiz dajcawj ndeu youh daj gwnz ranz swng hwnjdaeuj lo. Ndown youq rog ranz yawj gij hoenzfeiz sug youh najseng, gou youh lumj dauqma seiz iq lo, lumj yawjraen gyoengq doengzdohi youq henz rij ndaengjfeiz……

Ai, gij hoenzfeiz ranzcoj dwg cungj foux ciengzseiz diuq youq dingj ranz he, cungj youq ndawsim boux youzbyaij youq diegrog riengjret diuqfoux; gij hoenzfeiz ranzcoj youh lumj diuz rij ngutngut ngeujngeuj ndeu, cungj youq ndawsim gou “ding doeng” yiengj mbouj dingz; gij hoenzfeiz ranzcoj lij lumj duj va ciengz hai ndeu, ciengxlwenx mbouj rox reuq bae!

Gvaq ciet sat yaek ma yienhsingz, daj ndawranz naengh ci okdaeuj seiz, gou youh sibgvenq muenghyawj aen mbanj menhmenh liz gyae, gou maqmuengh ndaej yawjraen gij hoenzfeiz geu bae geu dauq. Hoeng gou youh saetmuengh lo——Hoenzfeiz dajcawj menhmenh siu bae gizgyae lo, gij ndwenngoenz mwh iq gou hix siu bae gizgyae lo, hoeng, youq ndawsim gou, geu hoenzfeiz mbanjranz mbouj siu bae gvaq, ciengxlwenx mbouj rox siu bae!



“Hix mbouj dwg, Buzsimjsam gangj daxmeh Siu Cuh ndangdae mbouj daiq ndei, daegnuengx de lij oi, hongranz caeuq hongnaz cungj aeu miz vunz guh, ndigah siengj ce Siu Cuh lai youq ranz song bi dem, caj daengz de ndaej 19 bi caiq gangj.”

“Dahraix?”

“Gou naemj coenz neix aiq dwg caen.”

“Baenzneix hix ndei.”

Lungz Byauh nam dwk, daxmeh lij nyinhnaeuz de doiq Siu Cuh mbouj miz eiqsei lo, gig sim’ angq, riu dwk lumh mbaq daeglwg, danq gaemz heiq ndeu naeuz: “Gangj ndaej hix deng, bohme de yaek ce dahlwg youq ndawranz song bi, raeuz lij caj de song bi? Caiq yawjyawj dahsau ranz wnq,

·Sawcuenhraz Lwgnyez·

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

gvaq song bi gou aeu umj lan lo, mwngz naeuz deng mbouj deng?”

Lungz Byauh mbouj siengj caeuq daxmeh de lai gangj lo, aenvih de rox daxmeh de gig saenq sawmingh, mbouj nyienh aeu Siu Cuh guh lwgbawx, byawz ndaej rox de caeuq Siu Cuh song boux cungj miz cingzeiq lo, ciuhvunz neix baenzlawz ndaej doxbaen ne?

Ngoenz daihngaih, Lungz Byauh caenndang buet bae ra Buzsimjsam, gouz de lwnh geij coenz vah hawj Siu Cuh, aenvih de saedcaih mbouj ndei caiq bae ra Siu Cuh lo.

“Gangj maz vah? Gou itdingh coenz he hix mbouj lauq bang mwngz lwnh hawj Siu Cuh.” Buzsimjsam sikhaek dapwngq lo.

“Cingj mwngz lwnh hawj de, gou

caj de song bi!”

“Ha? Mwngz yaek caj de song bi?”

“W!” Lungz Byauh haeb naengbak, ngeix le yaep he, ciepdwk naeuz, “vihliux hawj bohme de mbouj miz vah gangj, gou sikhaek bae Yanghgangj.”

“Ai, mwngz bae Yanghgangj guh maz?”

(caengz sat)